



CUCIAN menggunakan air secara kerap mampu mengurangkan kandungan nitrit yang hadir secara semulajadi.



SARANG burung yang telah siap diproses sedia untuk dipasarkan.

Isu kandungan nitrit jejas industri EBN

Oleh ASHRIQ FAHMY AHMAD

ashriq.ahmad@utusan.com.my

JIKA dahulu industri sarang burung walet atau lebih dikenali sebagai EBN (Edible Bird Nest) melonjak naik akibat permintaan yang tinggi daripada negara pengimport utamanya iaitu China, kini industri tersebut diancam isu kandungan nitrit (NO_2) yang berlebihan.

Berikutnya itu, pihak kerajaan China telah mengehadkan pengambilan EBN dari Malaysia. Malah stok yang telah berada di negara tersebut juga telah dibekukan menjadikan harganya kini merudum teruk.

Kerajaan China mendakwa EBN yang dibekalkan oleh Malaysia mengandungi kandungan nitrit yang berlebihan di mana boleh menyebabkan masalah kesihatan.

Isu tersebut telah dipanjangkan sehingga kerajaan China menuntut sekiranya Malaysia ingin terus menjual EBN ke negaranya maka kandungan bahan kimia tersebut perlu di kurangkan, malah sehingga sifar.

Permintaan tersebut dilihat adalah agak mustahil berikutan kandungan nitrit sememangnya sedia ada dalam mana-mana tumbuhan organik, air dan pelbagai lagi.

Di samping itu, hanya EBN yang diimport dari Malaysia sahaja yang paling ketat dikenakan tindakan tersebut.

Menurut Pensyarah Kanan, Fakulti Perubatan Veterinar, Universiti Putra Malaysia (UPM), Profesor Dr. Saleha Abdul Aziz, nitrat atau nitrit adalah bahan kimia yang terdiri daripada kandungan oksigen dan nitrogen serta gabungan pelbagai sebatian organik dan bukan organik.

Jelas beliau, kandungan nitrit boleh ditemui di sekitar kita seperti air dan tumbuhan hijau yang mana boleh menghasilkan *endogenously* (kandungan yang terdapat dalam organisme atau sel).

"Malah nitrit juga kadang kala digunakan dalam produk makanan lain



NOH Omar melihat sarang burung yang dikumpulkan di Pusat Dagangan dan Depositori Sarang Burung Autentik Malaysia yang pertama di Puchong, Selangor baru-baru ini.

EBN palsu turut jadi ancaman

SELAIN isu kandungan nitrit dalam EBN, industri sarang burung walet juga kini mengalami masalah lambakan EBN palsu yang dihasilkan menggunakan bahan kimia.

Kehadiran EBN palsu juga turut menyebabkan industri sarang burung walet kini semakin parah.

Terdapat beberapa syarikat dari negara jiran yang tidak bertanggungjawab telah menghasilkan EBN palsu dan menjadikan Malaysia sebagai transit untuk mengimport produk tersebut ke China.

Apabila kerajaan China mengesahkan produk palsu itu diimport dari Malaysia, secara automatik mereka menganggap semua produk tersebut berasal dari negara ini.

Justeru, ada masa yang sama kerajaan negara China turut mengambil tindakan berhati-hati dan memperketatkan kadar pemeriksaan terhadap produk EBN dari negara ini.

Untuk membendung perkara sedemikian berlaku, kerajaan melalui Kementerian Pertanian dan Industri Asas Tani (MOA) meletakkan syarat bahawa setiap syarikat tempatan yang mengeksport sarang burung walet ke China perlu memperoleh tiga perakuan.

Ia termasuk sijil penanda kesihatan veterinar, sebelum produk mereka dibenarkan masuk ke negara tersebut.

Sijil tersebut boleh diperoleh daripada Jabatan Perkhidmatan Veterinar (JPV) dan mereka juga perlu mendapatkan perakuan Sistem Pengenalan Frekuensi Radio (RFID) daripada Suruhanjaya Komunikasi dan Multimedia (SKMM) dan sijil kesihatan daripada Kementerian Kesihatan.

Memetik kata-kata, Menteri Pertanian dan Industri Asas Tani, Datuk Seri Noh Omar ketika beliau merasmikan Pusat Dagangan dan Depositori Sarang Burung Autentik Malaysia yang pertama di Puchong baru-baru ini, ketiga-tiga perakuan itu bertujuan memastikan kualiti sarang burung memenuhi piawaian yang ditetapkan.

“Sebelum ini, syarikat yang mengesport sarang burung walet hanya memerlukan satu sijil perakuan sahaja, tetapi kini syarat itu ditambah ekoran kemerosotan pasaran eksport sarang burung walet dari Malaysia pada tahun lalu,” katanya.

Tambah Noh, kemerosotan itu berlaku akibat kandungan nitrit yang didapati berlebihan pada sarang burung walet dari Malaysia selepas pemeriksaan oleh pihak berkuasa China.

Bagaimanapun satu nilai minimum kandungan nitrit akan diumumkan Kementerian Kesihatan, sebelum mengeluarkan sijil perakuan kepada syarikat yang terlibat bagi memulihkan industri EBN negara.



ANTARA reka bentuk rumah sarang burung yang terdapat di negara ini.

seperti penghasilan keju dan bahan berdasarkan keju, daging mentah mahupun yang diproses dan pelbagai lagi.

"Ia juga digunakan dalam pelbagai produk makanan bagi mengelakkan pertumbuhan bakteria clostridium botulinum dan juga sebagai bahan pengawet dalam industri daging," katanya.

Beliau berkata demikian semasa membentangkan kertas kerja Isu Nitrat dalam EBN sempena Seminar Transformasi Industri Sarang Burung Malaysia: Mendepani Cabaran Piawai Baru anjuran Institut Teknologi Makanan (MIFT) di Kuala Lumpur baru-baru ini.

Tambahnya, kandungan nitrit tersebut jika diambil oleh manusia secara berlebihan ia mampu membantu mempercepatkan pertumbuhan sel kanser dan tumor di dalam badan terutamanya bagi orang dewasa dan mampu menyebabkan penyakit leukemia kepada kanak-kanak.

Justeru, kehadiran kandungan nitrit di dalam EBN bukan sesuatu yang baru dan ia boleh dikurangkan.

Jelas Dr. Saleha, kandungan nitrit boleh dikurangkan dengan cara membilas EBN menggunakan air biasa secara kerap.



SALEHA ABDUL AZIZ

Malah, proses pemanasan juga dapat mengurangkan kandungan nitrit dan semakin tinggi suhu digunakan maka semakin banyak nitrit dapat dikurangkan.

Bagaimana pun kandungan nitrit juga boleh berubah-ubah antaranya keadaan bahan mentah (EBN), selepas proses pembersihan dan produk akhir (sup sarang yang ditinkan).

Kandungan nitrit juga boleh bertambah dalam EBN melalui air yang digunakan semasa proses pembersihan serta beberapa faktor lain.

Justeru isu kandungan nitrit di dalam EBN bukanlah merupakan satu isu yang sepatutnya diketengahkan sehingga menyebabkan industri pengeluaran EBN negara terjejas dengan agak teruk.

Malah terdapat kajian yang menunjukkan terdapat beberapa produk makanan di China juga dikenal pasti mengandungi kandungan nitrit yang agak tinggi.

Ia seperti sayuran jeruk sebanyak 20 miligram setiap kilogram (mg/kg), susu segar 0.4 mg/kg malah tidak ketinggalan air mineral sebanyak 01 mg/kg.

Justeru kandungan nitrit bukan sahaja terdapat didalam EBN malah mana-mana makanan dan air yang digunakan oleh manusia, apa yang jelas isu tersebut hanya diperbesarkan.



Nitrat atau nitrit adalah merupakan bahan kimia yang terdiri daripada kandungan oksigen dan nitrogen dan juga gabungan pelbagai sebatian organik dan tak organik